

Inatsisartut Aatsitassat pillugit inatsisaat nr. 7, 7. december 2009-meersoq aammalu suliat tassunga tunngatillugu suliarineqartut pillugit, siunertaralugu siunissami misissueqqissaarnernut akuersissutinullu tunngatillugu Inatsisartut tusarniaaffigineqarnermikkut akuutinneqartalernissaat pillugu apeqquaqat aallaavigalugu oqallinnissamik siunnersuut.

(Inatsisartunut ilaasortat, Naaja Nathanielsen aamma Juliane Henningsen, Inuit Ataqatigiit)

Akissuteqaat

(Inuussutissarsiornermut Aatsitassanullu Naalakkersuisoq)

Kalaallit Nunaanni atortussiassat aatsitassanit pisut pillugit siunnersuisooqatigiinnut taamanikkut atuuttunut tunngavimusimavoq, siunnersuuteqartup aamma oqaatigisaatut, aatsitassarsiornermut suliaasaqarfik danskit /kalaallit ataatsimoorullugu susassaqarfigimmassuk folketing-ip inatsisaatigut inatsisitigut maleruagassaqartinneqartoq. Aatsitassanut ikummatissanullu inatsit taamanikkut atuuttoq malillugu illuatungeriit tamarmik immikkut itigartitsisinnaatitaapput. Taamaattumik aatsitassarsiornermut suliaasaqarfimmi aalajangiinissanut inassuteqaatit Naalakkersuisunit aamma Nukissiuuteqarnermut ministeriamit inassutigineqartut pillugit Danmarkip aamma Kalaallit Nunaata akornanni naalackersuinikkut isumaqatigiisitsiniarnissaq Siunnersuisooqatigiit pingaarnertut suliaassarimavaat.

Namminersorlutik Oqartussat aatsitassarsiornermut suliaasaqarfimmi inatsisiliorneq aammalu oqartussaasuunissaq tigummassuk, assinganik Inatsisartut annertunermik peqataatillugit naammassineqartussamik pisariaqartitsisoqarunnaarpoq. Kisiannili aatsitassarsiornermut suliaasaqarfimmi naalackersuinikkut siunnerfiit ingerlanneqartut inatsisiliortunit annertuumik tapersersorneqarnissaat Naalakkersuisut pingaartittorujussuaat.

Taamaalilluni Kalaallit Nunaanni aatsitassarsiornermut suliaasaqarfimmi aningaasaliinissamut soqutiginninnerup attatiinnarsinnaanissaanut, naalackersuinikkut anguniakkat ingerlanneqartut inatsisiliortunit annertuumik tapersersorneqarnerisa aammalu innuttaasunit tapersersuinerup atuutsiinnarsinnaanissaat pingaaruteqartorujussuovoq. Politikikkut tapersersuineq aammalu aalajangersimasumik siunnerfeqarneq aatsitassarsiornermut suliaasaqarfiup ullumikkut aningaasaqarnermi siuariartornermut iluaqutaalereerneranut aalajangiisuulluinnartumik tunngaviuvoq.

Aatsitassarsiornermut suliaasaqarfimmi naalackersuinikkut ingerlatsineranut tunngatillugu nalornisoqalissagaluarpat, nunanut allanut aningaasaliisussanik pilerilersitsiniarnermi unammillernitsinni iluaqutissatta kimittunerpaat ilaat ajornanngitsuaqqamik annaasussaavarput, tassalu naalackersuinikkut anguniakkatigut patajaassuseq aammalu atugassarititaasussanut killissaliussat aalajangersimasut.

Taamaattumik Inatsisartut peqataatinneqartarnerisa annertusinissaa pillugu tunngaviatigut siunnersuuteqartoq isumaqatigaara. Kisiannili paarlattuanik tamanna Inatsisartut inatsisiliortutut aammalu Naalakkersuisut oqartussaaffimmik ingerlatsisutut inissisimaneranni oqimaqatigiisitsineranut ajoqutaanngitsumik pissaq.

Maannakkorpiaq Kalaallit Nunaanni misissuineramik ingerlatsinissamut soqutiginninneq annertoorujussuuvoq. Tamatuma kingunerisaanik akuersissutit tunniunneqartut rekortiliinertut amerlassuseqarlutik amerlasoorujussuupput. Akuersissutit amerlanertigut atugassarititaasut nalinginnaasut ilisimaneqareersut tunngavigalugit tunniunneqartarput aammalu nunami aatsitassarsiorluni misissuinnissamut akuersissutinik tunngatillugu annertunertigut oqartussaasut suliarinninnerat aalajangersimasumik aammalu suleriaaseq aalajangersimasoq atorlugu ingerlanneqartarpoq, Inatsisartut akuliutsinneqarnerat allaffissornerup annertunerulerneranik aammalu sulianik suliarinninnerup sivisunerulerneranik kinguneqaannartussaalluni.

Aatsitassanut ikummatissanullu inatsimmi maleruagassaq malillugu suliassaq avatangiisinut inuiaqatigiinnilu pissutsinut annertuumik sunniuteqassasoq ilimagineqarpat, VVM-imik avatangiisinut sunniutaasussanik nalilersuineramik aammalu VSB-mik inuiaqatigiinni piujuartussamik iluaqutaasumik sunniutaasussanik nalilersuineramik pinngitsoorani suliaqarnissaq piunasaqaatigineqarpoq. Taanna suliarineqareerpat akuerineqarlunilu, tamatuma kingorna akuersissut tunniunneqarsinnaavoq aammalu ingerlatassat akuersissuteqarfigineqarsinnaallutik.

Takorloorsinnaavara tunngaviusut taamaattut, aatsitassanut ikummatissanullu inatsimmi aalajangersagaasut, Naalakkersuisut akuersissutit pillugit aalajangiinissaat aammalu ingerlatanik taamaattunik akuersissuteqarnissaat sioqqullugu, sulianut ataatsimiititaliamut saqqummiunneqarsinnaasunut atorneqarsinnaasut.

Takorloorsinnaavara siunissami suliassat pingaarutillit oqaaseqarfiginissaat siunetaralugu Inuussutissarsiornermut Ataatsimiititaliamut saqqummiunneqartarsinnaasasut.

Tamanna pillugu Naalakkersuisut siunnersuutigissavaat siunnersuutigineqartup siunertai akuersaarlugit siunissami piiaanissamut akuersissummik qinnuteqaatit aatsitassanik iluarsartuullugit pilersaarusiit angisuut Naalakkersuisut aalajangiinissaat sioqqullugu Inuussutissarsiornermut Ataatsimiititaliamut saqqummiunneqartassasut. Aamma taamatut pisoqartarsinnaavoq uuliamik akuersissummik qinnuteqartut sinnerseraallutik neqerooruteqartoqarsimatillugu.

Sulisaaseq pineqartoq pilersinneqarsinnaavoq aatsitassanut ikummatissanullu inatsit allangorteqqaarnagit.